

МОНГОЛ УЛСЫН ХУУЛЬ

201... оны ...дугаар сарын-ны өдөр

Улаанбаатар хот

ЗЭЭЛИЙН ХҮҮНИЙ ХУВИЙН ДЭЭД ХЭМЖЭЭГ ТОГТООХ ТУХАЙ

НЭГДҮГЭЭР БҮЛЭГ НИЙТЛЭГ ҮНДЭСЛЭЛ

1 дүгээр зүйл. Хуулийн зорилго

1.1. Энэ хуулийн зорилго нь банк болон банк бус санхүүгийн байгууллагаас иргэн, хуулийн этгээдэд олгох зээлийн хүүний хувийн зохистой дээд хэмжээг тогтоох, Төв банк бодлогын хүүг, арилжааны банк зээлийн хүүний хувь хэмжээг энэ хуулиар тогтоосон зээлийн хүүний хувь хэмжээнээс хэтрүүлэхгүйгээр тогтоох, хуулиар тогтоосон зээлийн хүүний хувийн дээд хэмжээний хэрэгжилтэд хяналт тавихтай холбогдсон харилцааг зохицуулахад оршино.

2 дугаар зүйл. Хуулийн нэр томъёоны тодорхойлолт

2.1. Энэ хуульд хэрэглэсэн дараах нэр томъёог доор дурдсан утгаар ойлгоно:

2.1.1. “банкнаас иргэн, хуулийн этгээдэд олгох зээлийн хүүний хувийн дээд хэмжээ” гэж зээлийн хүүний нэгж хувь жилийн 18 хүртэл байхыг;

2.1.2. “банк бус санхүүгийн байгууллагаас иргэн, хуулийн этгээдэд олгох зээлийн хүүний хувийн дээд хэмжээ” гэж зээлийн хүүний нэгж хувь жилийн 35 хүртэл байхыг;

3 дугаар зүйл. Нийтлэг зарчим

4.1. Энэ хуулийг хэрэгжүүлэхэд Монгол Улсын Үндсэн хуулийн Нэгдүгээр зүйлийн 2 дахь хэсэгт заасан зарчмаас гадна дараах нийтлэг зарчмыг баримтална:

4.1.1. ил тод, нээлттэй байх;

4.1.2. зээлийн хүү тогтвортой байх;

4.1.3. Хууль дээдлэх, шудрага байх;

4.1.4. судалгаа, шинжилгээнд үндэслэсэн байх.

ХОЁРДУГААР БҮЛЭГ ЗЭЭЛИЙН ХҮҮНИЙ ХУВИЙН ДЭЭД ХЭМЖЭЭГ ТОГТООХ

4 дүгээр зүйл. Зээлийн хүүний хувийн зохистой дээд хэмжээг урьдчилан тандан судлах

4.1. Банк болон банк бус санхүүгийн байгууллагаас иргэн, хуулийн этгээдэд олгох зээлийн хүүний хувийн зохистой дээд хэмжээг урьдчилан тандан судлах ажлыг энэ зүйлд заасан аргачлалын дагуу тусгай журмаар зохицуулна.

4.2. Энэ хуулийн 2.1-т заасан аргачлалаар судалж, зөвлөмж гаргана.

5 дугаар зүйл. Зээлийн хүүний хувийн дээд хэмжээ

5.1. Банкнаас иргэн, хуулийн этгээдэд олгох зээлийн хүүний хувийн дээд хэмжээ нь жилийн 18 хувь байна.

5.2. Банк бус санхүүгийн байгууллагаас иргэн, хуулийн этгээдэд олгох зээлийн хүүний хувийн дээд хэмжээ нь 35 хувь байна.

5.3. Банк болон банк бус санхүүгийн байгууллагаас иргэн, хуулийн этгээдэд зээл олгохдоо энэ хуулиар тогтоосон зээлийн хүүний хувийн дээд хэмжээнээс хэтрүүлж тогтоохыг хоиглоно.

ГУРАВДУГААР БҮЛЭГ БУСАД ЗҮЙЛ

6 дугаар зүйл. Хууль тогтоомжийн хэрэгжилтийг зохион байгуулах

6.1. Энэ хуулиар тогтоосон арилжааны банкнаас олгох зээлийн хүүний хувийн дээд хэмжээний хэрэгжилтэд Төв банк, банк бус санхүүгийн байгууллагаас олгох зээлийн хүүний хувийн дээд хэмжээний хэрэгжилтэд Санхүүгийн зохицуулах хороо тус тус хяналт тавина.

7 дугаар зүйл. Хууль зөрчигчид хүлээлгэх хариуцлага

7.1. Энэ хуулийг зөрчсөн иргэн, хуулийн этгээдэд Эрүүгийн хууль, эсхүл Зөрчлийн тухай хуульд заасан хариуцлага хүлээлгэнэ.

8 дугаар зүйл. Хууль хүчин төгөлдөр болох

Энэ хуулийг 2019 оны 1 дүгээр сарын 01-ний өдрөөс эхлэн дагаж мөрдөнө.

ГАРЫН ҮСЭГ

